



## Ritryndar greinar í Iðjuþjálfanum

### Leiðbeiningar til höfunda

Höfundar þurfa að fylgja leiðbeiningum í hvívetna. Gera skal ráð fyrir að ferli ritryni taki minnst sex mánuði og því þarf handrit að berast ritstjóra og fræðilegri ritstjórn með góðum fyrirvara á netfangið [ritnefnd.ii@sigl.is](mailto:ritnefnd.ii@sigl.is). Greinin skal hafa gildi fyrir iðjuþjálfafagið og/eða í þverfaglegu samhengi og getur verið hvort sem er á íslensku eða ensku.

Ritrynd grein í Iðjuþjálfanum getur verið:

- A. Rannsóknargrein - hámarkslengd 5000 orð fyrir rannsóknargrein byggða á eigindlegu eða blönduðu rannsóknarsniði eða 3500 orð fyrir meginlegga rannsóknargrein.
- B. Yfirlitsgrein - hámarkslengd 5000 orð.
- C. Greining á starfi eða starfsaðferðum - hámarkslengd 3500 orð.

Tilgreindur orðafjöldi vísar til meginþexta handrits og þar eru útdráttur, heimildaskrá, töflur, myndir og viðaukar ekki meðtalin. Útdráttur á íslensku og ensku þarf að fylgja öllum handritum. Sé greinin á íslensku skal íslenski útdrátturinn vera á bilinu 200-300 orð og sá enski á bilinu 400-500 orð. Sé greinin hins vegar á ensku skal enski útdrátturinn vera á bilinu 200-300 orð og sá íslenski á bilinu 400-500 orð. Í lok útdráttar eru tilgreind fjögur til sex lykilorð/orðasambönd á íslensku og ensku. Lykilorðin þurfa að samræmast þeim lykilorðum sem má finna í alþjóðlegum gagnagrunnum, t.d. MeSH. Nota skal APA-kerfið við tilvísanir í heimildir og gerð heimildaskrár.

## A. Rannsóknargrein

Rannsóknargreinar geta verið tvenns konar. Í fyrsta lagi greinar sem eru allt að 5000 orð og fjalla um rannsóknir byggðar á eiginlegu eða blönduðu rannsóknarsniði. Í öðru lagi greinar um meginlegar rannsóknir sem eru allt að 3500 orð. Í báðum tilvikum þarf handritið að innihalda útdrátt, inngang, aðferðir, niðurstöður og umræðu.

*Útdráttur:* Útdráttur er hnitmiðuð samantekt á tilgangi, aðferðum, niðurstöðum og ályktunum um gildi rannsóknarinnar. Útdráttur á að vera bæði á íslensku og ensku (sjá um orðafjölda hér að ofan). Í lok útdráttar eru tilgreind fjögur til sex lykilorð/orðasambönd á íslensku og ensku í samræmi við erlenda gagnagrunna.

*Inngangur:* Inngangur er gagnrýnið yfirlit yfir rannsóknir og annað fræðilegt efni sem tengist rannsóknarefninu. Koma þarf fram hvar frekari þekkingu skortir og rökstyðja þörfina fyrir rannsóknina sem um ræðir.

*Aðferð:* Hér er lýst öflun gagna, greiningu og úrvinnslu og aðferðafræðin í heild sinni rökstudd. Einnig er gerð grein fyrir úrtaki/þátttakendum rannsóknarinnar, réttmæti, áreiðanleika og siðfræðilegum atriðum. Lýsingin skal vera það skýr að unnt sé að endurtaka sams konar rannsókn.

*Niðurstöður:* Niðurstöður þurfa að vera settar fram á aðgengilegan og læsilegan máta og hafa skýra tengingu við markmið rannsóknar og aðferðir.

*Umræða:* Hér er fjallað um niðurstöðurnar, þýðingu þeirra fyrir iðjuþjálfafagið og ef við á aðrar fræðigreinar og hvernig þær falla að þeirri þekkingu sem fyrir er. Takmarkanir rannsóknarinnar eru tilgreindar og bent á þörf fyrir frekari rannsóknir og sköpun þekkingar á efninu.

## B. Yfirlitsgrein

Yfirlitsgrein (hámark 5000 orð) er kerfisbundin úttekt á ákveðnu málefni sem snertir iðjuþjálfafagið, s.s. starfsemi, hugmyndafræði, aðferðafræði eða siðfræðilegum álitamálum. Í yfirlitsgrein þarf að: (a) taka saman og lýsa hugmyndafræði og rannsóknum um efnið, (b) samþætta og leggja gagnrýnið mat á gæði fræðanna og (c) draga fram mikilvægustu atriðin og setja fram tillögur um svið þar sem þörf er á haldbetri þekkingu. Handritið skal innihalda útdrátt, inngang, aðferðir, niðurstöður og umræðu.

*Útdráttur:* Útdrátturinn gefur innsýn í tilgang úttektarinnar og hvaða leiðir voru notaðar til að finna og velja heimildir. Auk þess eru tilgreindar meginniðurstöður úttektarinnar og þýðing þeirra fyrir iðjuþjálfafagið og önnur fræðasvið eftir því sem við á.

Útdráttur á að vera bæði í íslensku og ensku (sjá um orðafjölda hér að ofan). Í lok útdráttar eru tilgreind fjögur til sex lykilorð/orðasambönd á íslensku og ensku í samræmi við erlenda gagnagrunna.

*Inngangur:* Í inngangi er efnið útskýrt og rökstutt af hverju úttektar er þörf. Auk þess þarf að gera skýra grein fyrir tengslum og þýðingu efnisins fyrir iðjuþjálfafagið og ef við á aðrar fræðigreinar.

*Aðferð:* Hér er lýst ástæðu þess að ákveðin leið var valin til að leita heimilda og tilgreina gagnasöfn og lykilorð. Gerð er grein fyrir viðmiðum til að útiloka, velja og meta heimildir og með hvað hætti upplýsingar voru dregnar fram og settar í samhengi.

*Niðurstöður:* Hér eru meginniðurstöður settar fram og gæðum þeirra lýst í hnotskurn.

*Umræða:* Í umræðu er ályktað um þýðingu úttektarinnar fyrir iðjuþjálfafagið og aðrar fræðigreinar. Einnig er bent á takmarkanir úttektarinnar og þörf fyrir frekari þekkingarsköpun auk þess sem settar eru fram tillögur að áframhaldandi rannsóknarvinnu sem tengist efninu.

### **C. Greining á starfi eða starfsaðferðum**

Í handriti (hámark 3500 orð) er lýst afmörkuðu dæmi úr starfi iðjuþjálfara og gerð gagnrýnin greining á því. Greiningin getur átt við vinnu með einstökum skjólstæðingi, fjölskyldu eða hópi, ákveðið matstæki, íhlutunarleið, kennsluáðferð eða starfsvettvang.

*Útdráttur:* Útdrátturinn er hnitmiðað yfirlit yfir greininguna, þ.e. gagnrýnin endurspeglun af dæminu sem fjallað er um og þýðingu þess fyrir iðjuþjálfafagið. Útdráttur á að vera bæði í íslensku og ensku (sjá um orðafjölda hér að ofan). Í lok útdráttar eru tilgreind fjögur til sex lykilorð/orðasambönd á íslensku og ensku í samræmi við erlenda gagnagrunna.

*Aðstæður:* Hér er starfsaðstæðunum og dæminu sem um ræðir lýst í stuttu máli.

*Gagnrýnin ígrundun:* Hér er lýst því sem fór fram og atburðarásin ígrunduð m.t.t. (a) hvernig og að hvaða marki starfið stýrðist af ákveðinni stefnumótun, hugmyndafræði og/eða rannsóknum innan iðjuþjálfunar, eða (b) hvernig starfið ytir undir skilning á ákveðinni stefnumótun og iðjuþjálfafaginu. Ígrundunin er tengd við hugmyndafræði og rannsóknir innan fagsins.

*Samantekt:* Greiningunni lýkur með samantekt þar sem varpað er ljósi á málefni sem hafa ber í huga í framtíðinni.

